

Memoire dressé par feu monsieur le Cardinal d'Ossat, sur les fautes, nullitez, attentats & abus commis par l'Euesque de Nantes, en l'vnion du Prioré d'Iseron, à la Chartreuse de Nantes.




A nuict d'entre le 23. & le 24. iours d'Auril, de la presente année 1603. mourust de mort soudaine Hardy du Bois, commendataire du Prioré S. Bernard d'Iseron, de l'ordre S. Benoist, au diocese de Nantes, dependant ledit Prioré de l'Abbaye S. Michel en Lair, dudit ordre de S. Benoist, au diocese de Lussón en Poictou. Et ainsi par la mort dudit Hardy, cessa la Commende, & vacqua ledit Prioré, à la disposition de nostre saint pere le Pape; pour estre ledit Prieur decedé en Auril, mois affecté à nostre saint Pere, pour le regard des benefices reguliers, au Duché de Bretagne, pays d'obedience. Aussi sa Sainteté donna en commende ledit Prioré, à René Courtin, clerc de la cité d'Angers, estant en Cour de Rome, & l'un des Secretaires du Cardinal d'Ossat: & en fust expedie signature, en datte du 27. May de ladite presente année 1603.

D'autre costé, il se trouue que le lendemain de la mort dudit du Bois Prieur, à sçauoir le 25. dudit mois d'Auril, les Chartreux de Nantes presenterent vne requeste à l'Euesque de Nantes: lequel Euesque, trois iours apres, à sçauoir le 28. du mesme mois d'Auril, desvni, lepara, & desmembra ledit Prioré d'Iseron, du corps de ladite Abbaye de S. Michel en Lair, au diocese de Lussón: & iceluy Prioré vni, annexa, & incorpora à perpetuité, à la mense conuentuelle de la maison & conuent de la Chartreuse dudit Nantes.

Lesquelles distraction & vnion sont nulles, & de nul effect & vigueur, à faute de puissance de l'Euesque distrayant & vnissant; qui n'a peu ny distraire de ladite Abbaye S. Michel, ny vnir au Monastere des Chartreux, pour plusieurs raisons. La premiere, pource que ce Prioré estant vacqué au mois d'Auril affecté au Pape, il estoit à la disposition de sa Sainteté: & par consequent, l'Euesque de Nantes, ny autre, n'a deu ny peu toucher; & moins priuer ladite Sainteté de la faculté de le conferer; quand bien ce benefice eust au reste esté subject à la iurisdiction de l'Euesque de Nantes, & de sa collation ordinaire: comme seroit vne Cure, vn Canoniat, ou vne Chapellenie.

La seconde raison est, que l'Abbaye de S. Michel en Lair estant au Diocese de Lussón, & non au diocese de Nantes; l'Euesque de Nantes, qui n'a aucune iurisdiction hors son diocese, n'a peu distraire ny separer de ladite Abbaye aucun membre en dependant, quand bien ledit membre n'eust point esté à la collation du Pape.



La troisieme raison est, que la mesme Abbaye de S. Michel estant reguliere & exempte de la iurisdiction de l'Euesque mesmes de Lussion; ledit Euesque de Nantes n'auroit eü aucune iurisdiction ny puissance sur icelle, ny sur aucun de ses membres, quand bien ladite Abbaye eust esté au diocese de Nantes, comme elle en est dehors.

La quatrieme raison est, que pour la mesme cause de regularité & exemptiõ, l'Euesque de Nantes n'a non plus eü puissance de faire aucune vnion ou incorporation à la Chartreuse de Nantes: laquelle, bien que située au diocese de Nantes, est neantmoins exempte de la puissance & iurisdiction de l'Euesque de Nantes. Tellement que, s'il y vouloit faire quelque correction ou reformation, les Chartreux luy diroient tresbien qu'il n'y a rien que veoir. Comme chacun peut dire en verité, qu'il n'y a que le Pape seul qui aye peu, ny qui puisse distraire & separer aucun membre de l'un de ces deux Monasteres, & l'appliquer & vnir à l'autre.

La cinquiesme raison est, que ces deux Monasteres sont de deux diuers ordres: & que le Pape mesmes n'entreprendroit pas aisément de transferer les benefices d'un ordre à vn autre.

Et toutesfois, par ladite sentence dudit 28. d'Auril, l'Euesque de Nantes dit faire ladite distraction & vnion *sumant les saincts Decrets, & l'auctorité à luy donnée de ce faire, par les saincts Conciles.* Mais il n'y eust iamais Concile ny saint Decret, qui donnast autorité à vn Euesque particulier, de disposer des benefices qui sont à la disposition du Pape, & priuer sa Saincteté de la faculté de les conferer: ny de distraire aucun membre des lieux pies, qui sont hors son diocese: & moins des lieux reguliers, & exempts de la puissance & iurisdiction de l'Euesque mesmes, en la diocese duquel sont lesdits lieux reguliers & exempts: transferer les benefices d'un Ordre à vn autre, ny d'vsurper l'autorité du saint Siege, & d'entreprendre & attenter ce que le Pape seul peut faire, & ce que mal aisément sa Saincteté feroit. Ains tous les Conciles & saincts Decrets enseignent aux Euesques, de respecter & reuerer le saint Siege, & d'obeir au Pape; & ne rien entreprendre, non pas mesmes es dioceses des autres Euesques leurs freres: tant s'en faut que sur l'auctorité & droicts du Pape & du saint Siege. Et la premiere ligne de ladite sentence du 28. d'Auril, en laquelle il s'intitule *Euesque de Nantes par la grace de Dieu & du saint siege Apostolique*, le pouuoit & deuoit admonester de l'obligation qu'il a, & de la gratitude qu'il doit, audit saint Siege: & de ne rien entreprendre ny attenter contre ny sur l'autorité & droicts du Pape.

Outre les susdites cinq nullitez à faute de puissance, il y a encores en ladite vnion dudit 28. d'Auril, vne sixiesme nullité: estant ladite vnion faicte sans le consentement de l'Abbé qui est à present, de ladite Abbaye saint Michel en Lair, & aussi sans le consentement des Religieux de ladite Abbaye. Ce que le Pape mesmes n'eust point faict: laçoit qu'il aye toute plenitude de puissance es matieres beneficiales. Ce que recognoissant ledit Euesque de Nantes, il faict mention en ladite vnion dudit 28. d'Auril, de quelques pretendus consentemens des Abbez ja morts. Mais il deuoit sçauoir que telles volontez desdits Abbez, estans demeurées imparfaites de leur viuant, & expirées par leur mort; Il ne les a peu reualider, nō plus qu'il ne pourroit resusciter lesdits Abbez morts.

Aussi a ledit Euesque de Nantes voulu colorer sadite distraction & vnion par quelques pretendus actes & commission de son predecesseur Euesque de Nan-

tes, en date du 19. Septembre de l'année 1585. Mais son predecesseur n'a point eü plus de pouuoir que luy. Et tout ce qui a esté dit du default de puissance de l'Euesque de Nantes d'aujourd'huy, a lieu aussi en son predecesseur. Et quand ledit Euesque d'aujourd'huy proceda de faict à ladite vnion, ledit iour 28. d'Auril; la commission de son predecesseur estoit aussi expirée par la commission & dissolution de son Euesché, que ledit predecesseur a faicte, long temps y a: & perimée & abolie par l'espace & interruption de dix-huict ans. Et en outre ladite commission, dès sa naissance & conception, estoit abusive & attentoire contre vn arrest solennel du grand Conseil du Roy, donné en faueur dudit du Bois, Prieur, contre lesdits Chartreux, en matiere aussi d'vnion du mesme Prioré, le 27. d'Octobre de l'année precedente 1584. Contre lequel Arrest l'Euesque de Nantes d'apresent, a aussi commis abus par lesdites distraction & vnion. Qui est encores vn septiesme defect & nullité en son vnion, outre les precedentes cottées cy dessus. Lequel seul defect, quand il n'y auroit autre mal en son vnion, fera tousiours declarer abusive toute sa procedure, par ledit grand Conseil du Roy, & par toutes les autres Cours souueraines du Royaume.

Voila donc quant à la distraction & vnion que l'Euesque de Nantes feist ledit iour 28. d'Auril. De la validité de laquelle se deffiant, tant luy que les Chartreux; Il en feist vne autre le 30. de May ensuiuant: apres auoir recourré vn consentement de l'Abbé viuant, de ladite Abbaye saint Michel du 5. May: & vn autre consentement encores du Prieur & Religieux de ladite Abbaye saint Michel, du 16. May. Lequel Abbé moderne voyant que ledit Prioré estoit vacqué en vn mois du Pape & non en vn des siens; fust aussi facile à consentir, comme l'Euesque de Nantes à faire, ce qui estoit au preiudice du Pape. Et lesdits Religieux, leur estant promise pareille ou meilleure condition des Chartreux, que d'un Prieur particulier; feirent aussi bon marché de l'auctorité & droicts du Pape, comme leur Abbé & ledit Euesque de Nantes. Mais outre que ceste seconde vnion a toutes les mesmes fautes, attentats, nullitez, & abus, qui ont esté cy dessus remarquez en la premiere (excepté le defect de consentement de l'Abbé moderne & des Religieux) elle en a encores vne autre propre & particuliere: en ce que l'Euesque de Nantes desmembre & vniist le 30. May, vn Prioré, duquel sa Saincteté auoit iure suo disposé, trois iours auparauant: à sçauoir le 27. du mesme mois de May: comme il appert par la date de sa signature.

Ce sont les principales fautes, qui ont esté remarquées es deux sentences de distraction & d'vnion desdits 28. d'Auril & 30. May. Quand on aura veu les autres actes, il s'en pourra descouurir beaucoup d'autres. Cependant, sans s'en enquerir plus auant, il se void que esdites distractions & vnions, il n'y a rien de sain, ny de valable, & que ce ne sont que nullitez, entreprises, attentats, & abus, & par consequent, qu'il n'a esté acquis aucun droit sur ladite Prioré, à ladite Chartreuse, par lesdites distractions & vnions; ny par les princes de possession en vertu d'icelles, ny par rien qui s'en soit ensuiui. Ains que celuy qui ja esté pourueu dudit Prioré par nostre saint pere le Pape, est vray & Canonique Prieur dudit Prioré d'Iseron: & obtiendra sentence & arrest de maintenuë, sans aucune difficulté, en quelque Cour que ce soit: comme feist ledit Hardy du Bois contre les mesmes Chartreux, & pour ce mesme benefice, au grand Conseil du Roy, en ladite année 1584. Lequel du Bois neantmoins, n'auoit alors à beaucoup pres, son

droict si clair & si liquide, comme a à present le nouveau pourueu par nostre
sainct pere le Pape. D'autant que en ce proces là cõtre ledit du Bois, lefdits
Chartreux auoyent Bulles d'vñion de nostredit sainct Pere, qui seul peut faire
telles vnions: là où maintenant, ils n'ont que des entreprises, attentats, nullitez,
& abus, d'un ~~Cõte~~ Euesque, qui n'a peu ny ~~faire~~ *dire faire*

qu'il s'a fait.

